

De schenschste Ort von Luise Becker, 1984

Wie jedes Johr ehr liewe Leit, do is jetzt werer Urlaubszeit.

Do fahren Mutter, Vadder, Kinner, Tante, mit Sack un Pack in anere Lande.

No Spanien, Österreich, Portugal, wohe des is doch ganz egal.

Wer bleibt dann noch in unserm Lande? Des sein bloß mer, mer Hirnverbrannte.

Mer wissen halt, wos wirklich schee es, - - in unserm Stobach,
wann's ach klee es.

Mer hun doch alles was mer brauchen, e' guti Luft, do kannsche schnaufe.

De Wald nett weit, e' scheeni Landschaft weit un breit.

De Dunnerschberg grad vor de Deer. Ich frog eich jetzt, - - was wollen mer mehr?

Ach sein bei uns die Leit so nett, die sitzen owens uff de Trepp.

Un willsche mol was gutes esse orer trinke, do gehsche do e' vor ins Schwinde.
De Herrbruck, der is ach se empfehle, do kannsche ach was Gutes wähle.
Ach 's Hallche, 's Heegers un die Hitt, die machen beim Bewirte mit.

Ach hun mer hie noch e' paar Geschäftcher,
do kriche alles, vum Deppichborm bis zu de Heftcher.
Brausch'e neii Frisur un e' paar Welle, do gesche do e' nuff ins Schölle.
Un suchsche e' Blumestrauss, der wo net so schnell derdt,
- do gehsche zum Hansi oder zum Gerd.

Die Banke die sein ach vertrete, dann Geld, des brauch mer jo zum Lewe.
Vereine hun mer sticker siewe, do kannsche turne, wandre, fische, koche, kegle, singe,
un ache e' Instrument zum Klinge bringe.
Feiern die Vereine dann ehr Festche, do is was los in unserm Nestche.

E' Kerch, die wirklich wunderbar, die steht bei uns schon 500 Jahr.
Doch 's allerschenschte weit un breit, is unser Bürgerhaus ehr Leit.
Do kann mer feiere sei Festche un ach for Tagunge is es gut,
es is halt unser guti Stub.

Un wer no Stobach kummt, dem gefallts, es leit halt in de schene Palz.
Drum gehn mer ach vun hie nett fort, es is un bleibt: de schenschte Ort.